

A propos des soucoupes volantes

BONJOUR Flavie.

— Tiens, v'la mossieu Constant, que bonn's nouvelles ? Vous êt's rar' comm' les blaux jours !

— J'n'ai point gramint d'temps Flavie... Mais duch' qu'il est Zeph ?

— L'Zeph i-est au boulot.

— Et Zidor ?

— Qué Zidor ?

— Bé l'comarate ed vo n'homme ?

— L'comarate de m'n'homme ! et vous pinsez qui vient lchi pldant que m'n'homme i travail ? Pour qui ce que vous m'prenez ?

— Flavie, ch'n'est point cha que j'veux dire, mais j'sais qu'il est vintriloque.

— Vintriloque ? avec un nez comme i-a ? au contraire il parl' pustot du nez !...

— Vous n'me comperdez point, ej veux dir' qui si connot dins les as.

— Ah, cha ch'n'est point vrai, i n'ju jamais à cartes, et je n'm'ai jamais aperchu qui parlot avec sin vinte !

— Enfin, i s'y connot dins les étoiles ?

— Ah bon ! ch'est astrologue que vous voulez dire ?

— Peut êt' bin, mais vintriloque o bin astrologue, i si connot dins les loques !...

— Ah pour cha, ouais, i-est toudis habillé comme un loqu'eu

— J'vous cros, Flavie, mais j'voudros l'consulter concernant les sous-coupes.

— Les soucoupes ?

— Ouais, les soucoupes volantes, ch'est à cause d'cha qu'j'ai eu eun' tlot' discussion avec m'feimme.

— Bé, in effet, Mossieu Constant, je r'marqu' seul'mint à ch't'heur' que vo figure alle est tout' machucrée ! Quo qu'ch'est qu'vous avez r'chu à vo n'œul que vous saignez du nez ?

— N'min parlez point Flavie, m'feimme all' s'a mis in rach' à cause que j'y dijot qu'je n'croïos point aux « soucoupes volantes ». Ah ! cha n'm'étonn' point qu'all' m'a dit ainsin,

par

Constant COPIN.

« tous les aut's i-in vot'nt, mais ti te n'in vos jamais, seul'mint in salt qu'ch'est ti l'pus minteux d'Douala ; pis alle a ouvert l'ormoire. Ah ! malheur de mi ! les assiett's, les plats, sauciers et souplèr's, tout i-a volé dins m'direction. J'n'avos jamais vu voler tant d'soucoupes. Su l'service ed soixant'-quatorz' plèches, i n'rest' pus qu'deux assiettes. Quo qu'ch'est qu'vous in dites, Flavie ?

— Bah, vous savez Mossieu Constant, des feimmes ch'est toudis un tlot peu vif, pourquoi aussi qu'vous l'avez contrariée ? In tout cas, si vous n'avez jamais vu d'soucoupes, vous n'avez jamais vu voler autant d'assiettes, hein ? Mais, n'vous in faites point, J'va vous coler eun' paire ed rustines su vo figure et i n'y paraïtra pus... Là, arvoir Mossieu Constant...